

地350
42
部2295

第九十五册

卷一百七十五

土司考三

卷一百七十六

土司考四

卷一百七十七

土司考五



新纂雲南通志

盧

焱

漢

題



新纂雲南通志卷一百七十五目錄

土司考三

廢官三

景東直隸廳

蒙化直隸廳

永北直隸廳

廣西直隸州

武定直隸州

元江直隸州

鎮沅直隸廳

黑鹽井

琅鹽井

新纂雲南通志卷一百七十五

土司考三

廢官三

景東直隸廳

景東縣土知府陶德增其先阿只魯元時爲開南州管理統威遠及按板母龍猛統三甸明洪武初大兵至楚雄阿只魯子俄陶遣通事姜固宗阿哀納款獻象馬鎧仗並元所給牌印詔以開南地置景東府授俄陶知府事賜文綺襲衣頒印世其職十八年百夷思倫發叛率衆十餘萬來攻北吉寨俄陶禦之爲所敗率其民千餘家避於大理府之白崖川事聞帝嘉其忠遣通政司經歷楊大用齎百金文綺賜之爲立景東衛沐英討平思倫發俄陶仍舊職頒賜金帶且鐫誠

心報國四大字褒之俄陶卒子陶幹襲遂賜姓陶幹傳等等傳瓚正統中偕衛兵征麓川者張羽牙殺奉撒等晉階大中大夫資治少尹瓚傳洪洪傳榮游國學以孝義著榮傳炳炳傳化起化起傳金金未襲時者樂甸土賊來寇劫印去金追斬之奪印回及襲以壯勇聞金卒子淞襲嘉靖時征鐵索米魯那鑿安銓鳳繼祖烏撒諸役皆以兵從建立郡學淞卒子明卿襲事母至孝與母刀氏並以節孝受旌天啟崇禎間從征安效良普名聲有功加三品服明卿卒子璽襲以善事其親舉孝子璽卒子爾鑿襲年十八歿於倮賊之難無子以明卿弟明弼之子奎襲清初開滇奎投誠仍受世職奎告休子秉鑿襲秉鑿卒子澧襲澧卒無子秉鑿子大鑿襲土官舊有養廉田不納糧大鑿始請升科人稱其忠雍正五年擒土賊刀如正蒙賜銀緞並廢



監生一人大鑿卒子淳襲淳卒無子弟澄襲澄告休子士樵襲士樵卒子應昌襲應昌卒子熊襲熊有罪黜革道光七年子德增幼其叔父煊代理陶氏在明時每調其兵二千必自效千餘餉士之費未嘗仰給公家天啟六年官軍征貴州水西安邦彥明卿以象陣建功明史載之士司列傳清朝雍正間大鑿及淳俱以軍功顯論者以爲克繩祖武云

冊案

土知事姜之嶸其先姜固宗鎮南州人明洪武初以把事隨阿哀等齎故元所授土官俄陶金牌印信詣軍前納款尋以象馬入貢又從都督馮誠攻磔嘉擒土酋刀猛溫有功賜冠帶卒宣德二年固宗子嵩進京朝貢授猛緬正長官尋改本府知事嵩傳鉞鉞傳源源傳廷璧廷璧傳文嘉嘉靖中率夷兵從征鳳繼祖有功具題獎賞卒子可

久先以歲貢仕爲四川教諭以其子述望襲天啟三年督夷兵一千赴省防守歿於軍姜氏世爲土府首領凡發土府象兵皆以姜氏督之而可久能以文學仕入祀忠孝祠可謂賢矣清初平滇述望子啟濱投誠仍授世職卒無子以叔父顯望襲述望之弟也顯望傳啟武啟武傳繼申繼申傳增增傳之岐之岐卒無子嘉慶七年弟之嶸襲土知事之職原隨土府管理民事自康熙四年改土歸流後惟聽流官調遣雍正五年征威遠鎮沅逆夷雍正十年征茶山土酋刀興國俱委啟武管理軍糧議加級管地東至者千一百二十里磔嘉州判界東南至者後一百里者樂甸鎮沅界南至猛統者只哨一百二十里播猛按板威遠界西南至戛里村二百四十里瀾滄江界西至保甸巡檢司一百五十里雲州界西北至羊街二百六十里公郎蒙化

界北至安定舖一百四十里雀田蒙化界東北至火石哨七村鎮南

州界

冊案

保甸土巡檢陶元品其先陶暹景東鄉人明宣德中充土府頭目貢馬赴京授巡檢正統元年設巡檢司於保甸隸景東土府從征他郎甸者張羽牙砦有功陞縣丞仍管司事傳子華遞傳至承宣清初平滇承宣投誠仍授世職卒子增襲增卒子舜舉襲舜舉卒子瑜襲瑜卒子自淑襲自淑卒子仲選襲仲選卒嘉慶十六年子鎮襲鎮死長子翊廷襲翊廷死子元品道光二十六年襲

三岔河土巡檢楊天池其先楊勝板橋村人明宣德中充土府把事正統五年隨土府進征叛賊有功授土府冠帶把事卒子祥襲尋因三岔河哨土賊出沒又一碗水瓦窰坡二哨當寇賊之衝土知府陶

洪請設巡檢司防守從之以勝子詳爲土巡檢專任司事卒子鑾襲鑾卒子鶴承襲鶴承卒子國翰襲崇禎元年從征安效良有功加銜守備次年從征普名聲歿於軍子鴻緒襲鴻緒卒弟鴻仁襲清初平滇鴻仁投誠仍授世職卒子承文襲承文卒子可昌襲可昌卒子傅襲傅卒子起彬襲起彬卒嘉慶二年子天池襲管地東至火石哨七十里鎮南州七村界南至新站三十里灰窰界西至無量山五十里保甸土巡檢界北至安定舖二十里舊定邊縣界

冊案

板橋驛土驛丞雲錦其先阿賽景東鄉人明初充俄羅哨頭目通曉漢夷言語迎送賓旅得其歡心土府保充板橋驛土驛丞進京朝貢宣德六年麓川叛賊過江滋擾阿賽率鄉兵抵敵斬首三級陞銜巡檢管驛丞事卒子阿哀襲阿哀卒子阿徐襲阿徐卒弟阿秀襲賜姓

雲取名漢漢弟阿英取名雲滄漢卒無子雲滄孫必高襲必高父端雲滄子也有疾故傳其子必高卒子騰襲騰卒子聯極襲清初平滇聯極隨土知府投誠仍授世職卒子振宗襲振宗卒子仍襲仍卒子嵩襲嵩卒乾隆四十四年子燦南襲燦南死子大章未襲故孫現龍道光二十年襲現龍死子錦咸豐五年襲管地東至後山嶺十里本廳海村界南至鎮彝哨十五里西至回黑山村前山界十里北至豬街二十里

案冊

蒙化直隸廳

土知府左蔭曾其先左青羅元明爲順寧府同知傳至禾爲九部火頭順寧司通事明洪武十四年大兵至雲南詔諭諸蠻十五年平其未服者左禾款附十七年以禾爲蒙化州判官永樂九年禾入朝貢

馬賜予如例其子伽從征麓川戰於大侯功第一進秩臨安知府掌蒙化州事正統中陞州爲府以伽爲知府諸部江內諸蠻性柔馴江外數枝以勇悍稱每應征調多野戰無行伍伽卒孫琳襲琳卒弟瑛襲瑛傳銘銘傳正先是左氏世襲知府正統間設流官通判而印仍掌於土官正德間印歸通判而別給左氏知府鈐記萬曆間改通判爲同知給銜曰蒙化府掌印同知印之歸官自正始也正傳文臣文臣傳柱石柱石傳近嵩近嵩傳星海清初平滇星海投誠仍授世職傳子世瑞世瑞傳嘉謨嘉謨傳麟哥麟哥傳元生元生好文能作大字傳孫長泰長泰子蔭曾道光七年襲管蒙城新興安邊三鄉並隆城色左三村谷波羅楓木橋小莊團山喇把六五朵阿村八寨倮夷土舍東至濫泥哨五十里趙州界南至瀾滄江一百六十里雲州界

西至杉松哨一百四十里順寧府界北至三台嶺一百里趙州界又南至南澗安定舖二百六十里景東界案冊

南澗土縣丞阿士偉其先阿魯明洪武十六年從征叛酋刀思良奮勇效謀有功授定邊縣土縣丞傳至阿應鵬清初平滇應鵬投誠仍授世職傳子志經志經傳世忠世忠傳世勳世勳傳抱琛抱琛傳紹唐紹唐傳天成天成傳天章天章傳閣鳳閣鳳傳鍾琳鍾琳傳鍾英道光七年襲定邊本楚雄府屬縣雍正七年裁縣治以其地來附改稱南澗設巡檢而土官隸於廳鍾英死傳子士傑後帶練助勦西逆積勞身故次子旋亡三子士偉同治十二年襲管地東至高山哨二十里趙州界南至雀田哨八十里景東界西至雀山哨五十里蒙化界北至平安哨二十五里蒙化界案冊

蒙化州判官楊良元末楊良為蒙化州判官明授鄧川州青索鼻土

巡檢雍正志

漾濞驛土驛丞尹義明初從征佛光寨授職其傳世無攷王崧道光雲南志鈔土司志以下簡稱

土司志

永北直隸廳

北勝土知州高長祐其先高俊段氏忠臣高泰祥之裔也泰祥殉國元憲宗官其子高瓊高長壽等當段氏時高大惠鎮成紀元至元十五年於其地設州旋改北勝州又改北勝府高氏世官其地自俊傳至斌祥元末為知府明初歸附洪武十七年改府為州隸瀾滄衛以斌祥子策為知州復設土判官亦以高氏為之明史土司傳宣德四年土判官高琳子英來貢方物請襲父職十五年土知府高瑛來朝

貢考北勝改府爲州或云洪武十五年或云十七年何以宣德中復有土知府之名高世氏譜又無琳瑯二代與史氏駁異蓋高氏官於北勝者二家一爲大惠之後一爲泰祥之後其稱知府也或以判官加銜或以知州加銜傳世既久莫辨其支派矣永樂六年策子銘襲爲知州傳子昶正統六年從征麓川著有奇功陞授府同知仍管州事七年州蠻苦於瀾滄衛官軍侵漁以州直隸雲南布政司設流官吏目一員昶傳子泰泰傳弟秦秦傳子聰聰傳子崙以功績卓異授四品散官朝列大夫傳子德德傳承祖承祖傳子世懋世懋無子傳弟世昌初承祖歿時世懋甫六歲其嫡母木氏撫孤代理既長始任事萬曆四十八年世昌以弟襲兄職其族子蘭妄稱世昌乃姦生子不當襲訟之官不聽世昌畏逼走麗江告舅氏知府木增尋還至瀾

滄宿客舍蘭圍而縱火殺其家七十餘人發其祖父墓自稱欽授把總大掠麗江木增請討之謂法紀弁髦尾大不掉不治將有隱憂上官嘉其義命增率所部進勦獲蘭梟之世昌傳子斗光清初平滇斗光投誠仍授世職傳子贊熙贊熙傳子配助配助傳子良弼良弼傳龍躍乾隆二十二年緣事革職遷徙以其子祖培襲傳子興道光二年興子守箴襲高氏自斌祥至守箴凡十八世初後晉時高氏佐段思平建大理國高氏世爲顯官段氏世衰國人立高昇泰爲主其子泰明遵昇泰遺命復以位還段氏元兵破大理高泰祥被執不屈而死世祖嘆爲忠臣其苗裔世守北勝可想見遺澤之遠矣管地東至馬喇長官司三百里四川界南至鐵索箐二百七十里賓川州界西至所屬革草郎七十里孫土司界北至老鴉箐十五里章土司界所

屬夷人五種曰楚夷曰白夷曰栗粟曰羅羅曰西番

案

北勝土州同章天錫其先章吉帖木兒元末爲北勝府土官知府時北勝未改州也明洪武十五年西平侯沐英克大理吉帖木兒率所部歸附英命其子觀音奴從征三營叛賊部兵逃伍降授土同知暨改府爲州因改同知爲州同傳子觀音海遞傳章英章遠能章輔凡五世皆以子繼輔無子傳弟輪初土官替襲必至京師天順八年敕雲南等處土官今後告襲者三司勘明會奏該部行令就彼冠帶襲職於是土官不至京師輪襲兄職在奉敕後矣輔傳子宏宏傳子鵬鵬當嘉靖時從征叛酋鳳朝文等疊次建功及子講承襲猶以前功受賞講傳子采采傳子成文成文傳永永傳柱國柱國無子弟興國襲清初平滇興國投誠仍授世職傳弟佐國佐國傳子法祖法祖傳

子祖蔭祖蔭傳子蔭陞蔭陞傳子兆祥兆祥傳子昶昶歿時其妻馬氏懷妊七月及期生男名鶴齡循例以昶母高氏撫孤代理高氏老死而鶴猶幼未符承襲之例復以其母馬氏撫孤代理俟鶴齡年滿十五承襲咸豐間以迤西軍務疊次出力克復廳城賞加五品銜鶴齡死子天錫應襲管地東至四川長官司界三百里南至高土司界十五里西至龍潭漢民界十里北至瀘蕩站河界一百二十里所屬

夷人三種西番摩些栗粟

案

華坪土千總李鳳文其先某緣清康熙三十四年四川中所番夷作亂奉調隨營征勦以功保授土千總職世襲自李有德襲職後傳國良國良傳良琛良琛傳琛榮琛榮傳楷楷傳椿椿傳鳳兆鳳兆傳鳳翔咸豐間李鳳彩襲以軍務出力有功保加土守備職同治三年遇

害賜卹如制後傳至李鳳文案

廣西直隸州

元之廣西路明洪武初改爲廣西府土官普德歸附使署府事傳至昂貴肆惡不法成化十一年革職安置彌勒州改設流官土司志

土司照磨高仁義明姚安府土同知高賢族兄也英宗正統六年從定西伯蔣貴征麓川累功授姚安府照磨及賢子貴嗣爲同知於仁義爲從子而官居其上以爲嫌迺調廣西專司巡緝傳至齊嵩無子以支屬文啟襲隨革除土司志

師宗州土知州阿的其先世普恩元時爲武德將軍明洪武初的歸附授土知州二十年同廣西知府普德彌勒知州赤善各遣人貢馬詔賜文綺鈔錠傳至孫瓏哥遂以瓏爲姓傳至有光死妻妾秦氏昂

新纂雲南通志

卷一百七十五 土司考三 廢官三

八

氏分領州事衆夷無統紀因以恣肆傳至瓏耿遣李璜赴京請襲璜竟請改土設流職遂除土司志

彌勒州土知州赤善廣西府志作喜明洪武二十年貢馬弘治十年改設流官

職除土司志

舊維摩州土知州資氏世領州事設流官後資高資金相繼作亂州治爲墟其後資金爲家奴所殺世絕土司志

諸土官部龍鄉土舍曰昂尙才子欽在永安砦孫世英在白者鄉尙有部束仰之普世隆石洞砦之李世華俱以土舍稱祿慶里砦之龍得牙阿榮星砦之普承宗車砦之鳴鳳山俱以營長稱滇繫

武定直隸州

南詔諸蠻三十七部武定爲羅婺部明初因元之舊置軍民府其土

官始於弄積妻商勝

弄積蠻司合誌作法
叔此從武定府志

洪武十四年首先歸附授中順大夫

武定軍民府女知府考其世族本東爨烏蠻居幸邱山中宋孝宗淳

熙間有阿兒者

阿兒明史
作阿歷

能服其衆大理段氏舉爲羅武部長武即娶之

轉音也阿兒子矣襪矣襪子普解普解子矣根矣根子矣格世襲其

職理宗淳祐十二年元世祖以太弟征雲南矣格降順命爲北部土

官總管傳子郡則

一作
虧則

中統中

宋理宗
景宗時

置羅武路爲武定路以安邦爲武

定路軍民府土官總管傳子安慈自阿兒至安慈傳土七世安慈字

惠山綽有武略以功授武德將軍賜龍虎符金牌兼雲南行省參政

順帝至正二十四年卒子弄積嗣積一名三保奴以功陞授亞中大

夫兼管八百司元帥自世祖末年征八百大甸喪師者屢矣而定之

者由弄積功甚大於是兼制全滇勢益大然安慈弄積兩世俱能其

官崇祀名宦祠與賽典赤輩爭輝弄積死子海積幼其妻商勝攝事

明洪武十五年正月運米千石至金馬山接濟大軍招諭人民十六

年遣使貢馬二十四匹入京覲太祖既受土知府誥命十七年還府

二十六年請告子海積襲建文二年商勝卒商勝雖蠻裔而識天命

所在又善於撫卹夷衆安之成祖嗣統仍稱洪武三十五年海積入

覲永樂元年死於會同館二年以其妻薩周襲三年入覲十一年死

商智者海積子弄交之妻也弄交前死黔國公沐晟請以商智襲成

祖從之初商勝以女土官能先中慶澂江三路達魯花赤歸忱於沐

英英因資其入覲得世守滇服北門英旋鎮雲南倚爲捍蔽及讓帝

遜荒至雲南黔國因送之武定土府成祖初年海積入覲讐於天威

恐其事露殂於臺邸實自裁也而薩周商智以二女子仍遵前志庇

讓帝往來不廢忠順亦事之難者而其蹟甚隱矣宣德二年商智卒無子以海積弟弄積之子阿寧襲會連年發師征麓川調各土兵阿寧老不任劇乃請告以子矣本襲時景帝景泰元年也傳子金甸金甸無子以庶弟鳳英繼職鳳英本名阿英字時傑弘治三年入覲孝宗寵異之賜姓鳳自此以鳳爲姓十三年奉命征竹子箐梁王山以功進亞中大夫十五年征貴州普安以功進雲南布政司右參政正德二年征師宗豆溫鄉功尤偉賜盡忠報國金帶一具六年卒英之在官也正己愛民勤幹政務歷練武勇弓馬嫻習當道交薦故所至有功又知人善任麾下樂爲用命其自梁王山歸也偕賓佐泛舟掌鳩河勒功石壁具載英之世系其晉參政在弘治壬戌而武定府志謂正德丙寅鳳英賄交太監劉瑾陞以雲南布政司左參政仍管府

事英擁衆入省欲於布政司堂上任司官不許乃於儀門上任即返

按蠻司合錄亦有此說

又謂元謀尉談章署縣事揭英諸不法於撫按具奏奉旨勘

問農部瑣錄云弘治時朝政清明不容此濫授造此說者惡其後人之叛逆而波及之也又云明史本傳亦謂晉參政在正德初皆誤按明史繁

進秩於正德三年而無儀門上任之事

英既歿子朝明襲朝明字景昭土名矣祿早補雲南府諸

生器頗不凡正德十五年征廣西府十八寨以功賜寶鈔表裏自鳳英勳高位顯諸土酋皆憚之而朝明復負才望頗懷異志火頭吾孟才撫其叛狀告之官朝明被劾革職乃陰遣心腹劉宣董溥載金寶賄錢寧求復官錢寧者故廝養結鎮守太監錢能冒官參將甚用事既入朝明賄令宣溥冒滇人保舉得內批襲知府部檄下巡按唐龍執奏朝明罪不當襲郎中蘇天秀覆奏得旨朝明仍降土舍然其知

府事如故也及死子鳳昭襲

昭明史作詔此從武定志

昭土名矣折字承恩心志甚大

而鳳氏已漸衰昭奉母瞿氏典府事其妻索林佐之昭叔朝文潛蓄異謀嘉靖七年尋甸土酋安銓反都御史傅習討之敗績歐陽重代習令朝文屯守祿勸之廠江朝文素與安銓通銓之反由尋甸知府馬性魯裸撻其妻其妻鳳氏女也明年春朝文遂自廠江擁兵叛還攻祿勸武定陷之殺同知袁俸知州秦健等十三人時瞿氏母子俱奔省城朝文遂與銓連兵二萬屯於省城西北門外焚軍民房屋雲南大震諸大吏不能畫一計唯倉皇報聞而已詔以右都御史伍文定爲兵部尙書提督雲貴川湖軍務調土漢官軍討之初沐氏世鎮雲南諸土官之進止予奪歸其掌握故有蠢動輒易制世鎮滋疑防閑周密臨之以中官牽之以撫按有事必與三司會議動多掣肘土

官承襲積至二三十年不得職自是鎮臣之權分而土官慢令玩法無所忌憚朝文因是給其衆謂瞿氏母子已被戮朝廷且盡勦武定夷衆信之諸失職者雲集響應盡從朝文官軍遣二人入朝文軍招諭之仍抗命且執留二人不令返所調集各土舍聞流言又重自疑畏不敢前時黔國公沐紹勳雖制於三司意不慊然世守土有急終自任當文定未至時即督所部先進以便宜榜示失職者先給冠帶俟破賊後奏請承襲於是土官子弟咸感奮競進擊賊斬強渠十餘人朝文奔回武定按平朝文之功府志沒沐氏不著此據明史敘之紹勳疏請教授方略得便宜行事並賈各土舍罪有功許承襲作其敵愾之氣世宗賜敕獎勵紹勳無所牽制益得施展即令瞿氏母子親寫夷書解散其衆安銓勢孤亦走還尋甸官軍伺賊退始出城設空營以逐之瞿氏與昭率衆自省城

回武定蠻民相顧驚喜曰我主故在也咸投鳳昭降朝文計窮乃東奔絕普渡而走土官追敗之朝文仍與安銓合圍副使張義於木密修撰楊慎戍滇憤大吏之畏縮縱賊以殃民也乃爲惡氛行曰金碧山前惡氛起賊馬來飲滇池水城西放火銀漢紅炎燄城頭高十里兩重日暈圍白虹萬家仰首呼蒼穹相顧慘然無顏色嗚呼命寄須臾中賊徒渾幾箇枕戈臨水臥我軍屯北門分明不敢過土酋脅盟來索官城上無言騎堞看父老倉皇雙泣泗細說去冬尋甸事絃急柱促柄倒持首禍今朝竟何自堂堂之陣誰主兵喁喁公等皆儒生賊來不敢令出哨賊去俱解排空營豈無雄武士奮身思一決咫尺轅門不敢前怒髮衝冠氣填咽况聞千金逐日費連月公儲已傾竭土官抄掠盡村園升天無梯地無穴熙皞閭閻踰百年太平官府眞

神仙紫微迢迢華蓋遠虛將敲扑威窮邊邊隅一旦紛解瓦暗鳴變作擎拳者暗鳴擎拳兩奈何君不見建武年中任校尉又不見開元年中張虔陀蓋安銓之亂由馬性魯裸撻其妻所致也慎旣爲詩傷之會賊困義於木密所義與慎同鄉慎聞即戎服率僮奴及步卒百餘馳往援之合謀固守而紹勳所部各土司兵亦至於十二關副長官李弼鄧川土知府阿國楨率鳳羽鄉尹巡檢上江嘴楊巡檢箭桿塲字巡檢及他土司兵俱會於木密戰城外慎率城內兵開門出夾攻之李弼於馬上擒賊黨沙凹者烏等尹巡檢亦攻李鎖飛李牙保等敗之賊大潰朝文率家奴數人取道霑益走東川霑益營長輔祐追斬朝文於湯郎箐而安銓衆猶盛據尋甸故巢列寨數十官兵分哨夾攻之先後皆破乃併力攻拔其必古老巢銓奔東川入芒部

爲土舍祿慶所執其下阿志因斬以降生擒渠賊千餘斬首級二千餘俘獲男女千二百餘牛馬器械無算迨文定至而賊已平矣字巡檢名廷宣本朝文之族而爲國忘私力戰功多人頗賢之語在世官志論者謂是役也微瞿氏母子之夷書賊不即解省城必危微慎之戎服往援木密亦危賊必復集滇禍不可遽解而先是巡按晉安郭楠疏乞宥慎下詔獄因世宗怒慎甚故不敢紱慎功文定既至但處置未盡事宜亦無敢爲慎言於是梟朝文與銓首示諸夷籍其產家屬戍邊而瞿氏與昭招撫良善萬有七千出粟千石接濟復業救出被擄男婦五百餘口給親完聚解散餘黨二萬餘人武定人心自此安靖且夫土官非甘於亂也夷人愚而戀主番部謹於所事其積威之漸有由來矣彼其世世嚴畏者沐氏耳中官撓沐氏之權而撫司

從中牽率吏胥上下其手請襲非賄不行彼所貪者爵命既不可得則益以自棄至於罪惡彰著然後興師討之軍民日困地方日壞惜空名之爵貽無窮之禍朝廷非必爲此由姦腐迂鄙之徒玩褻以濟其私至於斯極大學士楊一清滇人也深悉其弊因鳳氏之亂慟切陳之沐紹勳亦以爲言雖得旨允行究不能革自是朝廷惰媮封疆敗壞日甚一日迄於滇亡皆坐此弊昭既平朝文功仍襲知府職閱三年征蒙自習義有功患疹卒於軍朝廷優恤賜銀百兩遣官致祭昭既卒而瞿氏以母襲子官先是府印自洪武以來俱掌於土官正德間有司議以流官同知掌印於是土府權輕惟專巡捕徵糧而已瞿氏既襲所轄四十七馬頭阿臺等請以印屬瞿氏吏部循舊例從其請十六年瞿氏仍掌府印權復重然瞿氏頗善撫馭守土盡職相

安者數十年阿倫者朝文之養子也朝文既誅阿倫倖免三十六年
易門夷李向陽與土縣丞王一心作亂稱混天王以普文爲軍師構
黨七千人分布四境潛與阿倫通然事猶未顯會小人構謀劫印歸
索林乃以瞿氏告老舉索林自代上請索林既襲遂失事姑禮此事紀載
不同或以

爲姑有外行或以爲婦自竊
位然當以鄧世彥之言爲主

瞿氏大恚乃陰翼阿倫爲子挾其甥婿貴州水西土

舍安國亨四川建昌土官鳳氏兵力謀奪索林官以與阿倫不克乃
令阿倫挾賫入京具疏自誣爲索林囚禁詣闕告之阿倫因更名鳳
繼祖納級指揮使詐稱受朝命已襲武定土府與馬冠帶以歸土人
爭附之遂逐索林據其府索林抱印歸會理巡按官諭解之索林歸
武定視事如故而復聽繼祖留瞿氏所於是婦姑隙益深索林因與
總管鄭竑等謀誅繼祖事洩繼祖遂大發兵圍府行劫和曲祿勸等

州縣索林復抱印走省城巡撫曹汴下令收印逮鄭竑等繫獄令瞿
氏暫理府事而貸繼祖責其自新赦宗慶接汴後請討繼祖不能克
雲南土縣丞楊訓死之遂罷兵繼祖潛往會理招集亡命誘索林與
講好新撫呂光洵因遣索林鄭竑等回武定繼祖遂執殺竑等七十
人糾衆攻武定之新城臨安通判胡文顯督百戶李鼇土舍王德隆
來援至雞溪子隘遇伏兵鼇及德隆俱死繼祖出掠富民羅次界東
川營長阿科其婦翁也助之攻曲靖尋甸諸府其勢大熾光洵以繼
祖劫殺自恣惡燄逼人於是奏調各土司兵分路進勦先是兵備僉
事張澤將尋甸兵二千馳救新城戰敗及千戶劉裕俱被執賊劫以
求撫澤不許且潛書趣光洵進兵勿以己爲念光洵乃命分哨而進
逢賊於武定大軍奮勇衝突虜營矢鋒雨集礮聲雷鎗百里之內原

草爲赤光洵親壓敵壘熊羆十萬縱橫轆轤賊遁歸東山寨即三台山也官軍圍之兵鋒筍束行陣篋密飛鳥不過螻螟不通繼祖計窮乃攜澤及索林走照姑澤終不爲求撫遂害澤官軍追之急乃由直勒渡過江依阿科衆謂賊旣入蜀境茫茫林箐無路可攻盍釋諸光洵力排衆議定策造舟戒令速發金礮掀天旌旗蔽日履險如夷直趨姜堡而巡按劉思問亦以狀聞詔雲南四川會兵進討光洵招徠嚮導圖寫地形望影揣情知賊不遠運籌遙授警戒軍中是夜果有三千餘賊衝劫官營官軍有備擒斬百餘大呼追逐墜崖落澗者無算遂乘勝尾賊至會理寨賊設伏道官軍先覺入葛可山大破之直搗蒲桃村毀賊營千餘間斬伐林箐一十三處繇是刮野掃地莽翳如濯鬼無隱跡物無遁形四面夾攻不容綏罅初繼祖之走東川也

土官鳳氏與之通已而見滇蜀官兵及祿紹先等兵皆會乃背繼祖發卒七千來濟師繼祖益窮窘賊帥者色遂斬繼祖赴紹先營以降惡黨卞大才阿力趙士傑等先後皆伏誅先是繼祖旣與李向陽王一心通而姚安土同知高欽及弟鈞亦與相應光洵甫至即誅李向陽至是大姚縣土官高繼先縛欽鈞並斬王一心四凶旣除諸夷膽落餘黨降者釋之復業凱歌而還萬姓歡迎奏捷上聞欽至論功御史太和趙汝濂頌光洵功立碑於點蒼山謂甲子之夏斬僭號二賊於昆陽秋斬奚本等三賊於祿納冬擒者索於興化州乙丑誅虧遮於尋甸昔之蜂屯蝟集者旣一掃而空乃令深根固蒂者又一戰而拔自此當宁無南顧之憂揆之武侯在漢勳著南征今日駿功誠不多讓云然是役也史稱黔國公沐朝弼應作沐紹勳破賊巢三十餘而汝濂

碑竟未之著光洵字仰卿仕履詳秩官志鳳氏既平武定同知鄧世彥條二十事請改土設流奏記於光洵光洵入奏免鳳索林罪授其支屬鳳歷子思堯爲土經歷事既允行鄧世彥記之曰雲南古靡莫地自哀牢內附不常我國家混一區宇中國其地赤子其人如武定設軍民府流同知佐焉因俗易政相忘於治鳳氏守官樂土與國同休可也鳳英謀孽朝文煽亂索林竊位釀禍繼祖再叛據城殺官奪印塵朝廷遠慮大兵勦滅法當族誅當道憫思堯穉年先逃省會冠帶之議改未決民夷聽撫前訴激者譎者吐者吸者小恐惴惴大恐縵縵其發若機括因籲衆悉造於庭曰巨魁戮餘黨附衆生矣若此者何居咸仰天嘯嗒不言勢重莫反當先之如改設何造庭者叩地震曰且暮得此其所由以生乎彥亦惴惴自任若有真宰而不得其

朕夜草二十事胥此意也當道悉允行上其議於朝欽陞劉公宗寅知府事添設推官譚君經降思堯襲經歷給莊田一百所莊戶以次編入圖籍不期月遐邇交賀曰而今後知流官之便於民也夫川竭而谷虛邱夷而淵實改設行而寧謐亦勢也難乎其議矣此議生於人心陳以臆見謀於各官主之者前院呂公光洵劉公思問今院陳公大賓劉公應賢也四公不自有其功歸之朝廷吁亦奚功純璞不殘孰爲犧樽白玉不毀孰爲珪璋土治相安孰爲改設今日之功鳳氏積累之罪也罪罪而功名焉二十事其侈說與以爲是而必行則俗惑於辯以爲非而必去則政敝於矯今種種之民訓行鄉約親親長長甘食易服樂俗安居將至老死而不惑且知法之無所用也嗚呼星星之焰涓涓之流毋決防而撲易因勒二十事於石時隆慶元

年十有一月也鳳思堯既襲經歷而夷人之赴府者必往拜謁思堯如主其父鳳歷以不得知府怨望陰結四川七州及貴州水西宣慰安國亨謀作亂劉宗寅遣人諭之不聽三年鳳歷糾衆稱思堯知府夜襲郡城城中備嚴不能入退屯魯墟宗寅夜出兵斫其營賊潰走至馬刺山擒鳳歷伏誅以爲鳳氏禍本已永絕矣而萬曆三十五年復有鳳阿克之亂阿克者繼祖之從子也鳳氏絕時阿克徙於江外蓋四十餘年矣有鄭舉者阿克之馬頭也阿克馬頭四十八人惟鄭舉富於財陳典墨吏也以同知晉知府假廉訪收禁舉舉置金魚腹饋典乃已已復收之如是再四舉惡其無厭陰蓄異謀時管甸馬一龍馬化龍等侵奪諸夷有司不爲理諸夷咸怨舉乘此與鳳阿克號召諸夷造反典略不爲戒曰夷虜何能爲已而典以事赴省而阿克連江外土兵大舉入寇攻武定城中狂徒爲內應守城士皆執袴子不習武事城破竟莫知賊入武定指揮金守仁千戶王應爵男婦四百五十餘人俱執義死千戶梅應時等戰死十二月阿克擁推官白通明以兵隨其後直抵省城竟無一卒迎戰明通至城下進公移請以典之冠帶印信給賊不許賊圍城從北門繞西門而東分道肆掠焚劫一空索印甚急許之乃去明日復來鎮撫不得已緝印與之始拔營歸武定立阿克爲知府陷元謀和曲祿勸諸城未一月破一府三州四縣雲南大震尋甸夷目大理保楊禮昭補阿白者色及夷婦每冲等盡叛明年正月賊破祿豐知縣蘇夢陽死之左布政使彭應時右參政楊俊臣副使陳陶都司范繼斌游擊段辰守備斐希度王之瑞分兵討阿克六月諸路進討賊去武定走克梯龍三藏已復奔

東川土司祿哲縛阿克鄭舉獻軍前餘賊鄭文鄭宗舜亦就擒惟武定印竟失所在俘阿克等九人至京師磔於市巡按鄧漢

漢明史作漢此從武定志

憤

之作武定變詩詩入詩錄其詩中中丞謂陳用賓守臣謂黔國公沐叡中璫謂鎮守太監某金王謂金守仁王應爵都尉謂白明通也諸人釀禍流毒僥倖平賊猶復論功漢先已疏陳其事詩中更痛切言之時叡父右都督昌祚已老矣恨叡與用賓比貽害滇南亦疏論失事狀而都司張名世殺平民冒首功詔逮用賓及叡與名世陳典白明通祿勸知州黃榜元謀知縣毛文彩俱下獄仍起昌祚鎮滇叡除名餘皆死用賓以十七年巡撫經理緬事頗有規模一旦變起蕭牆束手無策身填牢獄人皆惜之舊志稱其用兵如神平阿克功進都御史卒予謚廕蓋未究其始終也阿克既平越十餘年而鳳阿歹復

作亂阿歹者鳳氏之裔也鳳氏世職既革子孫淪於火頭天啓二年霑益土婦設科及土目補鮮柰科李賢期曲等叛陷各堡衛而阿歹與夷目張世臣糾小東川賊千餘攻他頗補和二堡陷之進攻武定知府胡其慥極力捍禦巡撫沈敬爝以便宜起參將李思忠援武定走世臣而東川酋亦反與霑益賊合陷城邑沒官軍勢張甚新撫閔洪學至以次恢復世臣訴乞降陽許之而以守備金爲貴駐倘甸李瑗駐補知四年七月李瑗等襲斬張世臣於他頗阿歹與其黨阿倉降亂始平阿歹旋死其婦奢卓東川法戛之女也贅江外魯雞爲夫自稱土舍翦滅鳳族肆行無忌歷數十年夷民受害滋甚清康熙四年和曲知州彭蠡以聞命左鎮沈應時勦之奢卓逃匿東川母家乃分武定尋甸兵戍撒甸七年索之急其母家始縛卓夫魯雞及婢僞

卓以獻吳三桂據滇卓復竊入撒甸雄制諸夷二十年吳氏平卓始
遵化夫卓以一夷婦藉鳳氏之餘威其夫乃後贅非鳳氏裔猶能煽
脅諸種抗顏行者十餘年究不能予以法鳳氏存日當何如哉鳳阿
愛者奢卓女蓋贅魯雞之所生也冒姓鳳已嫁貴州普安龍天祐爲
妻矣奢卓死阿愛假奔喪爲名逃歸據撒甸不回普安天祐死私招
常應運爲夫應運者馬龍之夷酋性最狡非如魯雞之甘代妻就縛
者遂冒鳳裔雄制諸夷未及三載阿愛死遺子鳳如松應運旋娶陸
氏乃復姓常生子曰常守嗣應運每出遊從夷姬數十戎服乘馬縱
轡山岡圍獵酣飲夷姬環坐抗喉而歌其徒連臂踏腳與歌相和所
過村寨雞犬皆空然夷民愚而戀主本非其主猶愛其似者而奉之
雖虐之至死終不肯叛五十四年知州李廷宰奉檄逐之明年應運

棄鳳如松而挾妻陸氏及幼子潛遁火頭魯甫阿俄等請於廷宰願
歸流官治無二心廷宰大喜謂往者入撒甸衆夷長矛勁弩相迎今
常酋已逐自是帖然矣乃爲詩曰重來不作往時看向化傾心比戶
安麥綠正逢新雨潤人歸猶帶舊刀瘢長矛勁弩銷藏盡夏稅秋糧
次第完開府運籌威德遠春風夷地起歌歡已而應運潛入絞平之
樹機不時出沒五十七年復入撒甸誘脅數千人攻卓於馬逼杉松
營距城四十里變起倉卒城中固不知也營卒俱出耕山無擐甲者
塘卒婦某見事急挾大鈔金鳴於山頭若集大衆狀賊疑有備遽退
走是役也徵此婦幾陷州城廷宰憤極白於總督蔣陳錫巡撫甘國
璧提督張谷貞發曲靖尋霑武定三路兵會勦師次鷓鴣河不進廷
宰以詩趣之云鷓鴣河畔擁貔貅春柳山花忽變秋月照寶刀橫壯

氣兵談虎帳出奇謀三軍行過仍雞犬一令傳來動岳邱血濺平蕪
酋首落昨宵東望墮旄頭蓋諷之也然官軍進次樹機時應運已過
江遁入東川迄漏誅而自死營弁馘其首傳於雲南應運死後陸氏
亦死諸夷遂散田土悉入官逮如松於馬龍送京師守嗣甫數齡爲
其奴某所竄官捕急某匿之於山箐採芋橡哺之用夷禮跪進事之
如主稍寬輒呼其侶與俱來所散黨漸復仍據故業陰相往來長吏
頗知之然不能問雍正間征烏蒙法戛長吏募土兵助勦土兵惟鳳
氏所統夙與慕連土酋那德發戰久最練且強參將南天章詞得守
嗣故在招奴某至曰吾知汝主在汝毋欺吾吾能出汝主必不汝欺
幸此時征法戛募土兵汝能出幾何兵助勦幸有功吾當爲汝請上
官入奏貫汝主罪復故業於汝何如其以汝主來某諾之然不敢以

守嗣出恐誘而誅之計以其子六斤代見天章不辨爲非守嗣也仍
使挾之歸某大喜自詭以五百兵從果如約某最勁健騎烏騅挾長
鏢直入賊巢官軍乘之遂平賊天章大喜遂以守嗣謁憲府給執照
仍居撒甸守嗣知讀書應童子科旋補諸生土人稱爲常土司不復
名鳳而鳳如松至京師亦蒙貫罪農部瑣錄曰人傳鳳氏專土時其
富敵國開銀廠二十四獲銀山積而獅子尾廠尤盛常一日出銀充
二十四路所畜牛馬六畜皆城而圈之今永平村前土垣周里餘即
鳳氏鳴城也又傳其家照寶鏡每開廠持鏡照之即知銀之所在其
說不經予論鳳氏之先世撫斯土有功德於民而矣格商勝當草昧
之初即知委命眞主不失舊物安慈弄積俱著績於滇崇祀名宦祠
薩周商智隱庇遁帝世篤忠貞鳳英偉雄才奏績於孝宗清明之代

雖朝文構逆兵犯省城西維震動而瞿氏一紙頓時解散可謂賢於十萬師矣故能保土享其富貴五百餘年末世驕盈自取敗滅盛極而衰數固然也鳳氏泯於武定而字忠一綫仍延於雲龍非有功德於民而能若是耶

土司志

元謀縣土官其先有廣哀者本夔夷也元時世襲知縣屬武定路時矣格爲北部總管廣哀屬之傳子阿吾明師下雲南武定女土官商勝首先歸附阿吾從之沐英令阿吾招諭所部仍守舊職是時武定軍民府二州一縣並以土官領之永樂初二州改設流官惟元謀如故武定舊志略載阿吾傳子吾起自是以吾爲氏起傳弟吾超以設流革除而明史土司傳載宣德元年元謀縣故土知縣吾忠子政來朝未知吾忠爲吾起之子抑吾超之子也此後世次無傳迨至嘉靖

七年尋甸安銓武定鳳朝文造反有吾大用者超之裔也率土兵從征效順殺賊功多授職巡捕傳子孟才萬曆三十五年鳳朝文之子阿克與鄭舉作亂陷武定祿勸元謀孟才屢有討賊功而酬之甚薄仍爲土巡捕而已然夷人不知巡捕卑仍以土知縣視之從其所役使無敢稍軼而必奎強悍過其祖父夷人咸效命與安南宣撫使沙源石屏土官舍人龍在田寧州土知州祿永命阿迷土巡檢普名聲俱號勁旅能殺賊天啓元年烏撒土酋安效良反安效良者霑益州土知州安紹慶之次子也紹慶之先世官烏撒土知府與霑益土知州安世鼎同族世鼎無子其妻安素儀奏取紹慶繼霑益職而紹慶之兄安雲龍爲烏撒土知府沒無後紹慶奏遣效良歸烏撒承襲雲龍之妻隴氏拒之爭奪垂數十年大吏不爲斷制會永寧宣撫奢崇

明水西土舍安邦彥同叛效良與之通陷烏撒衛伏兵畢節殺都司楊明廷糾土婦設科土目補鮮柰科李賢期曲張世臣俱叛陷霑益倘甸松林炎方交水白水六堡並陷平夷衛又破祿勸之他頗補知二堡合東川土酋祿千鍾等攻嵩明於是巡撫沈敬煥檄調必奎及祿永命普名聲龍在田等與參將袁善守備金爲貴宣撫使沙源馳救嵩明擊走效良而設科等復劫陸涼殺知州郭俊義效良合水西賊至霑益破官軍守備李加培周嘉映戰死亦佐營長安應龍引補鮮等陷亦佐縣寇越州圍羅平勢張甚蜀道幾不通會巡撫閔洪學至遣必奎與沙源袁善等討賊必奎遂恢復炎方松林等站蜀道復通而設科李賢張世臣亦先後誅夷效良見賊勢衰陽爲恭順遂函安應龍首及所劫烏撒衛所各印來獻洪學勞其使而歸之行至曲

靖盜殺其使會黔撫王三善死水西賊復熾效良因以殺使爲辭合邦彥崇明兵三十九營抵霑益袁善沙源力戰卻之必奎堅守炎方以老賊衆袁善乘勝間出與必奎內外夾擊復大敗之時五年三月也五月效良復入寇必奎與袁善沙源等大敗之於馬龍州效良走死賊平必奎以前後功晉土守備崇禎二年必奎復與龍在田收復烏撒當是時土司中吾必奎沙源龍在田祿永命普名聲並以屢從征討著名又共履戎行建功每有戰伐鎮撫大吏惟恃此數人巡按趙洪範按部有惡於名聲慫恿巡撫王伉討之四年名聲遂反使人求援於必奎且賄之伉不知也調必奎屯兵臨安攻名聲進圍阿迷從深箐入伏發必奎賣陣先走全師皆陷監軍布政使周士昌沒於陣參將朱永吉死之名聲既戰勝仍巧詞乞撫當事策無所出俯從

之亦置必奎不問明年名聲死或以爲廣西知府張繼孟所毒或以爲攻其兵頭何天衢中礮死或以爲其妻萬氏鳩之疑莫能明也名聲死後必奎內不自安八年流賊犯鳳陽詔徵雲南土司兵助討在田率所部精卒九千五百戰象四戰馬二十行而必奎等瞻望不前在田戰中原五年二十八捷諸將忌而逼之歸諸土司聞之謂諸將易與耳益驕蹇不奉命及獻忠據蜀寇氛漸逼雲南黔國公沐天波遣參將李大贄屯會川以防侵軼大贄貪婪數擾諸夷必奎不能堪遂結縣民王清劉升等據元謀叛時順治二年也九月遣兵頭高科吾凌霄陷武定府焚劫一空遂陷祿豐定遠諸城天波聞變調祿永命龍在田率所部征之且檄沙源之子定洲協勦永命等進兵元謀而定洲有他志逗遛於後在田等至喬甸率七八人直前突斬賊百

人而勒品土舍李從義亦率兵助之必奎大敗奔江外諸軍追至會川必奎窮蹙自殺其子安世先受天波招撫仍襲父官必奎既平定洲始抵昆明乘機而反走天波據省城稱安南王自是雲南傾覆禍發於吾必奎繼之以沙定洲孫可望李定國互相吞噬亂十餘年始定龍在田說孫可望攻滅定洲厥功甚偉其後以壽終於家祿永命以力戰死必奎累世有討賊功其才不下於在田使當時大吏善馭之何嘗不賴其用惜乎其不能且逼之使叛也

土司志

金沙江巡檢司土官李安吉奴大理人明初以部尉從觀音保出降後從沐英攻烏撒及征越州累功授巡檢沿至李齊楠聽襲後廢

參郡國利

病書 雍正志

摩耳山巡檢司土官劉保山昆明人亦以觀音保部曲歸附諭烏撒

永昌越州功授巡檢世職尋裁改銓金沙江沿至劉銀哥聽襲後廢

元江直隸州

明改元之元江路爲府洪武十七年其土官那直入朝貢象馬太祖命爲元江知府賜襲衣冠帶十八年置因遠羅必甸長官司隸之以土酋白文玉爲副長官直傳榮永樂三年人朝貢成祖厚加賜予改爲元江軍民府給之印信時百夷屢爲邊患榮請躬率兵及餽運往攻百夷成祖嘉勞之十二年那直子邦入貢方物宣德五年黔國公沐晟奏元江土知府那忠被賊刀正刀龍等焚其廨宇及經歷印信今獲刀龍刀洽赴京乞如永樂故事發遼東安置以警邊夷宣宗從之且命禮部鑄印給之忠傳端端傳憲嘉靖二十五年憲叔父鑑殺

憲奪其印並收因遠驛印記巡撫應大猷以聞世宗命鎮巡官發兵剿之二十九年那鑑密約交蠻武文淵謀亂撫按官胡奎林應箕總兵官沐朝弼奏請副使李維參政胡堯時督兵進勦鑑亦縱兵攻掠村寨朝弼與巡撫石簡調武定北勝亦佐等土漢兵分五哨調兵旣集朝弼與簡駐臨安分部進兵破木龍寨降甘莊賊勢漸蹙鑑遣經歷張維及生儒數人詣南羨監督王養浩所乞降時左布政徐樾以督餉至南羨樾迂闇聞維言謂鑑計窮乃約翼日命鑑面縛出城來降左右咸謂夷詐不可信樾不聽如期親率百人往城外受降鑑縱象馬夷兵突出衝之樾及左右皆死巡按趙炳然以聞世宗降敕切責樾簡職剋期捕賊贖罪朝弼與簡乃督集五哨兵環元江而壁令南羨哨督兵渡江攻城選路通哨甘莊哨各精卒二千佐之鑑知二

哨精卒悉歸南羨潛遣兵象乘虛衝路通哨官兵不意賊至倉猝燒營走監督亦維嶽奔入甘莊哨甘莊亦大潰督哨李維亦遁惟餘南羨逼城而軍武定女士官瞿氏寧州土舍祿紹先廣南儂兵頭日祿友仁咸恨鑑戕王奪嫡誓死不退督哨王養浩因檄獎之翼日鼓譟攻城賊大敗閉門不出官兵圍之鑑乞降官兵懲徐樾之敗不應城中拆屋而爨斗米銀三四錢時瘴毒起大兵乃復撤期秋未征之朝弼狀聞世宗定二哨失事諸臣罪行撫臣厚賞瞿氏祿紹先祿友仁等敕朝弼會同新撫臣郝象賢鳩兵討賊三十二年象賢至鎮調集土漢兵七萬人廣集糧運剋期分哨進剿爲必取計鑑懼服藥死象賢檄百戶汪輔入城撫諭其衆擒其賊首及戕土官那憲之阿捉殺布政徐樾之光龍光色等皆斬首以獻鑑子恕輸所占那旂封鑿等

村寨並出所掠鎮沅府印納象十二隻輸累歲逋賦象賢命官民推那氏當立者衆舉前土官那端從孫從仁象賢疏言其狀請廢恕貸其死命從切暫統其衆加汪輔以千戶職世宗從之萬曆十三年恕以招降車里功許襲祖職賞銀幣領長官司一曰因遠羅必甸遞傳至嵩土司志嵩事蹟詳列傳

按蠻司合誌嘉靖三十年那鑑以爭襲殺土州巡撫石簡督兵進討鑑詐降請赴軍門而親率勁賊與左布政徐樾至元江鑑毒江上流人馬飲之輒死師少卻鑑乃縱象騎直趨樾軍殺樾歸國公沐朝弼調土兵大勦鑑敗自殺遂革土官收印令臨安衛指揮一人住署之然其印猶藏那氏每文移指揮取印必以夷兵蜂擁送印至環伺之署訖復擁去萬曆中土舍那天福篋兄自立即鑑孫也按合誌所載與明史差互附錄之以備參考

當明初於元之元江路置馬龍他郎甸長官司洪武十七年以普賜爲副長官宣德八年普賜弟普寧入朝貢馬八月黔國公沐晟奏摩沙勒寨萬夫長刀甕及弟刀眷糾蠻兵侵占長官司衙門殺掠人民宣宗命遣人撫諭正統二年晟奏甕不服招撫請調兵勦捕英宗以

蠻衆仇殺乃其本性可仍撫諭之事遂不竟其後無攷志土司

新化州摩沙勒土巡檢普寧明洪武中歸附授職遞傳至榮榮傳弟

從化從化傳治治傳天曉清兵平滇天曉弟承勳投誠仍授世職康

熙四年迤東諸酋同反承勳潛遁不知所終志土司

新平縣南洞土巡檢易速明初歸附授署峩縣伽羅關巡檢傳至體

乾萬曆中從征蠻賊建新平縣改調南洞傳弟體元體元傳弟象極

清兵平滇象極投誠仍授世職康熙四年附王耀祖祿昌賢反伏誅

志土司

新平縣楊武壩土巡檢李尙義本魯魁山賊目清康熙二十七年投

誠授職二十九年復叛官軍討平之志土司

新平縣了味土巡檢普爲善本魯魁山賊目清康熙二十七年同楊

宗周受知府黃明招撫授職傳子永昌永昌傳子成忠後革除志土司

因遠羅必甸長官司白文玉明洪武十八年置因遠羅必甸長官司

隸元江府以土酋白文玉爲副長官二十七年知府那榮及白文玉

等來朝貢正統元年因遠羅必甸長官司遣人來朝貢馬嘉靖二十

五年土舍那鑑並收因遠驛印記明史土司傳

新化州土巡捕明馬龍他郎甸長官司普源之嗣立新化州設流官

授源之族叔潤土巡捕世職傳至清初普大謨後停襲新平縣志

儒林等里土千總施文瑞其先施糯利清雍正五年隨征鎮沅威遠

茶山十年隨征普洱思茅授土守備糯利死子配賢降等襲土千總

配賢死堂弟源襲源死子文瑞襲住居儒林里崑嵩村東至易租村

一百四十里南至猛野八十里西至漫帽四百里北至土弄村一百

六十里案冊

元江土千總刀兆慶其先刀世龍隨征有功清雍正八年詳給土千總委牌世龍死姪謹襲謹病退子廷錕襲廷錕死子鳳翥襲鳳翥死弟鳳鳴襲鳳鳴死子蔭曾嘉慶二十五年襲蔭曾死子兆純襲兆純故弟兆慶襲案冊

元江土千總王保和清康熙五十六年詳給廖盛魁土千總委牌盛魁死洪文緯充文緯死朱佩充佩死邵輝充邵輝死李鳳文充遞至楊春生充保升營千總以戴瓊林充瓊林死光緒八年王保和充案冊永豐里土把總方定柱其先方從化本魯魁山夷目山在新平縣東南九十里明天啓四年土賊魯魁魯克等據之梗化故以賊名名山立十二哨戍之清康熙二十七年總督范承勳令臨安府知府黃明

招撫從化歸附授土巡檢傳至純祖以不能約束夷衆停襲雍正五年純祖子國臣從征茶山江壩總督鄂爾泰給以土千總職銜十年從征普洱思茅有功總督尹繼善給以委牌管理舊制地方傳子正正傳子永祥永祥無子以姪保柱降等承襲爲土把總傳子印印無子道光七年印從叔定柱襲管永豐儒林善政惠遠各里村寨東至石屏州小河西一百八十里南至臨安府五土司界一百八十里西至他郎因遠一百二十里北至新平縣楊武壩界一百里案冊茄革里土把總方承勳其先方山蘇清康熙三十八年充從化里中土目約束夷衆山蘇死子國用接充雍正七年從征茶山江壩總督尹繼善給以土把總職銜傳姪體體傳子榮光榮光傳子椿椿傳子承勳道光八年襲住居茄革里東至石屏州小河西一百八十里南

至臨安府虧容司三百里西至普洱府猛康五百四十里北至新平縣趙密克二百四十里案冊

新平縣土縣丞楊思匡其先楊宗周本魯魁山夷目清康熙二十七年臨安知府黃明同總兵馬山招撫諸夷宗周率夷目方從化普爲善李尙義投誠授土縣丞二十九年尙義叛宗周束族衆無一人附賊得保舊職傳子世恩世恩傳子昌祚昌祚傳子際泰際泰傳子聖舉聖舉孫大生嘉慶二十五年襲大生死子鳳鳴未襲故孫思匡光緒十年襲住居新平縣西門內東至耆峩縣怕念鄉界七十里南至元江直隸州北界一百二十里西至者樂甸欺木嶺一百八十里北至磔嘉界碑二百八十里案冊

新平縣斗門磨沙

一名瓦白果

土千總邱紹明其先邱國良清雍正十年從

討叛夷楊昌奉等有功授土千總傳子嶧嶧傳子鍾瑄鍾瑄子鏗嘉慶二十四年襲鏗死玉林撫孤孫紹明襲住居南糯村瓦白果東至小渡口五十里南至元江州界四十里西至錯納賈三十里北至老是達二十里案冊

新平縣喇嘑土把總普廷光其先普應祥清雍正十年從討叛夷楊昌禮有功乾隆五年授土千總傳孫懷德懷德無子以其弟懷義降等承襲爲土把總傳子聯陞聯陞傳弟聯標聯標子暉嘉慶二十四年襲暉死普洋襲普洋死子幼姪廷良撫孤後子廷光應襲管地東至斗門六十里南至戛賽江四十里西至磨沙了味一百里北至哀牢山大水溝六十里案冊

新平縣他旦土把總普濬其先普洪亮清雍正十年隨父仁討叛夷

有功乾隆三年授洪亮土把總傳子忠忠傳子王臣王臣傳子映映子萬年道光二年襲萬年死弟萬青襲萬青死子濬應襲東至江邊二十里南至馬鹿塘五十里西至南蚌四十里北至水塘寨三十里

冊案

新平縣老是達土把總李國明其先李張保清雍正十年從征叛夷有功乾隆五年授土把總傳子朝聘朝聘傳子瑤瑤子澍有疾道光六年瑤子文治襲文治死子國明襲管地東至戛賽江六十里南至哀牢山三十里西至瓦白果四十里北至磨沙江五十里冊案

新平縣巖旺土把總李世康其先李顯智隨父毓芳討叛夷有功清乾隆三年授顯智土把總傳子鵬林鵬林無子傳姪世英世英無子嘉慶十八年世英從弟世康襲世康死子權襲權死子國俊襲管地

新纂雲南通志

卷一百七十五 土司考三 廢官三

一九

東至斗門界牌八十里南至戛賽江五十里西至磨沙江五十里北至哀牢山一百里冊案

鎮沅直隸廳

鎮沅土知府刀澣其先土知府刀允中清順治初投誠仍授世職子

長庚襲傳至刀澣於雍正五年以貪劣革職安插江寧改設流官冊案

土官刀平其先有中旺者元時爲元江路總管傳至平明洪武十五年與兄那直歸附授平千夫長建文四年置鎮沅州以平爲知州永樂中從征八百又從攻石崖者達寨外部整線來降陞鎮沅爲府以平爲知府先是洪武十五年置元江府以土官那直領府事那直殆即刀平之兄與平同時歸附者故授弟千夫長授兄知府明史分傳而不申言之略也平後傳至刀寧息嘉靖中調其兵千人從征尋甸

土舍安銓二十九年元江叛酋那鑑之亂安息子仁率兵從征克魚復寨初鎮沅印爲那氏所奪刀氏承襲皆以冠帶署事至是得印以獻世宗命仍給之傳至刀允中清初平滇投誠仍授世職安置江寧改流設官乾隆三十五年降府爲州直隸迤南道土司志

祿谷寨長官司在府東北永樂十年四月以祿平寨置明史地理志

者樂甸夷名者島明洪武末土官刀木板內附永樂元年設長官司十八年長官刀談入朝貢馬自是刀氏世領司事其地山險多瘴介於鎮沅元江景東間日事攻戰鎧械犀利兵寡而勅諸部憚之傳至刀晟清初平滇晟子宗喬投誠仍授世職傳子佩玉佩玉傳弟佩璋佩璋傳子聯斗雍正四年聯斗繳土長官司印請設流官遂改其地爲恩樂縣給聯斗九品冠帶土司志

黑鹽井

黑鹽井土官樊奇國李氏楊登高俱領巡檢沿至樊可亨李緒楊德

隆 郡國利病書 按鹽井不歸府轄地在府境應附於此

琅鹽井土巡檢李普政明初歸附授巡檢傳至李化樞明季舊設土

巡檢一員天啓間李淮無嗣停其承襲崇禎七年因土賊劫掠仍准

淮姪孫時秦承襲時秦故子化樞襲參雍正志 琅鹽井志

土巡捕李輔清其先李普政居寶泉鄉爲土人之長明洪武六年尋

獲鹽滷掘開成井煎煉有效授土巡檢世職傳至化樞凡七世清朝

平滇化樞投誠授土巡捕遞傳至勳年老告替道光二年子大源襲

大源死秉和襲秉和故乏嗣姪永森繼襲因年未及歲同治十三年

以堂兄李輔代辦案冊